

समे – 12:25

<><><><><>

**एह आकाशवाणी जम्मू ऐ, हुन तुस विजय बजाज कोला खबरां सुनो।**

<><><><><>

### **JKLA Special Session**

लेफ्टिनेंट गवर्नर मनोज सिन्हा हुंदे आसेआ सददेआ गेदा जम्मू-कश्मीर विधानसभा दा इक्क ध्याड़े दा खास इजलास एल्लै चला'रदा ऐ। हाल च होए दे पहलगाम आतंकी हमले पर चर्चा लेई एह खास इजलास सददेआ गेदा ऐ। पहलगाम हमले च 25 सैलानिएं ते इक मकामी व्यक्ति दी मौत होई गई ही ते केई लोक जख्मीं होए दे'न। विधानसभा दे खास इजलास दरान पहलगाम आतंकी हमले दे शिकार होए दे लोकें दे सम्मन च द'ऊं मिनटें दा मौन रक्खेआ गेआ। उपमुख्यमंत्री सुरिंद्र चौधरी होरें पहलगाम आतंकी हमले दी निंदेआ आहला प्रस्ताऽ सदन च रक्खेआ। इजलास एल्लै जारी ऐ।

<><><><><>

### **Army Firing LoC**

भइकावे आहली कार्रवाई दे तैहत पाकिस्तानी फौज नै जंदी रातीं कुपवाड़ा ते पुंछ जिलें च कब्जा रेखा पर बिजन इशतेयाल दे लौहके थेआरें कन्नै गोलीबारी कीती। रक्षा मैहकमे दे जन संपर्क अधिकारी होरें इस गल्लै दी तस्दीक कीती ऐ जे भारती बलें तुरत ते तगड़ेयाई कन्नै इस कार्रवाई दा परता दिता। ध्यानजोग ऐ जे पाकिस्तान आसेआ जम्मू-कश्मीर च कजा रेखा पर बार-बार संघर्ष विराम दी खलाफवर्जी कीती जा'रदी ऐ। रक्षा सूत्रें दस्सेआ ऐ जे पाकिस्तानी चौकिएं थमां बिजन भइकावे दे कीती जा'रदी गोलीबारी दा भारती फौज बनकदा जोआब देआ करदी ऐ।

<><><><><>

### **MoS Udhampur Security**

आतंकवाद गी बिंद बी बर्दाश्त नेई करने दे सरकार दे धेइये गी फही पक्का करदे होई केन्द्री मंत्री डाक्टर जीतेन्द्र सिंह होरें उधमपुर च इक उच्ची-सतह दी सुरक्षा जायजा बैठक दी प्रधानता कीती। सुरक्षा ते प्रशासन दे वरिष्ठ अधिकारिए उ'नेंगी उधमपुर ते कठुआ दे इलाकें च चलाई जा'रदी आतंकवाद-रोधी कार्रवाईं ते तुपाई आहले अभियानें बारे जानकारी दिती। एहदे अलावा सुरक्षा सरबंधी चेंताएं दे नबेड़े लेई लोकें दे नुमाइंदें ते सिविल समाज दे सदस्यें कन्नै बी इक बैठक लाई। बैठक दी शुरुआत च, पहलगाम आतंकी हमले च मारे गेदे लोकें दे सम्मान च द'ऊं मिनटें दा मौन रक्खेआ गेआ।

<><><><><>

### **Doda Tourist**

पहलगाम आतंकवादी हमले दे किश दिनें परैन्त गै आतंकवाद दे डर गी नकारदे होई मुख्य भरै थमां सैंकड़ां बद्धे सैलानी डोडा जिले च गुलडंडा ते छतरगला आहली सैलानी थाहें पर पुज्जे दे ना। इ'नें सैलानिएं दी जोश भरोची मजूदगी नै दलेरी ते एकता दे जज़्बे पर लोऽ पांदे होई आतंकवाद दे खलाफ इक तगड़ा संदेस भेजने दा कम्म कीता ऐ। डोडा जिला प्रशासन नै इस गल्लै दी तसदीक कीती ऐ जे सैलानिएं दी सुरक्षा लेई सब्भै लोड़चदे हीले कीते गे ना। इस मौके पर बोलदे होई किश सैलानिएं अपने तजुर्बे सांझे कीते।

<><><><><><>

#### President Awards

राष्ट्रपति द्रौपदी मुर्मू होर अज्ज संजा'लै राष्ट्रपति भवन च नागरिक सम्मान समारोह च पद्म पुरस्कार प्रदान करगंन। देसै दे सर्वोच्च नागरिक सम्मान च शामिल पद्म पुरस्कार त्रै श्रेणिएं-पद्म विभूषण, पद्म भूषण ते पद्म श्री च दिते जंदे ना। कला, समाज सेवा, जनहित आहले कम्मं, विज्ञान ते Technology, सार ते उद्योग, चिकित्सा, साहित्य ते शिक्षा, खेड्डें ते लोकसेवा समेत बक्ख-बक्ख खेत्तरें लेई एह सम्मान दित्ता जंदा ऐ। इस बरै गणतंत्र दिवस दी पूर्व संध्या पर सरकार नै 139 पद्म पुरस्कारें दी घोशणा कीती ही। एहदे च 7 पद्म विभूषण, 19 पद्म भूषण ते 113 पद्म श्री पुरस्कार शामिल ना। मन्ने परमन्ने दे वायलिन वादक ते संगीतकार डॉ. एल.सुब्राहमण्यम ते गैस्ट्रोएट्रोलॉजिस्ट डी. नागेश्वर रेड्डी, पद्म विभूषण कन्नै सम्मानत कीते जाने आलें च ते मन्ने परमन्ने दे संपादक ते प्रसार भारती दे साबका अध्यक्ष ए.सूर्य प्रकाश, अभिनेता अनंतनाग, नंदमुरी बाला कृष्ण ते एस.अजित कुमार, भरत नाट्यम नृत्यांगना शोभना चन्द्रकुमार ते भारतीय हॉकी टीम दे साबका कप्तान पी.आर. श्रीजेश पद्म भूषण हासल करने आलें च शामिल ना।

<><><><><><>

#### Handicraft-Awards

कपड़ा मंत्रालय दे दस्तकारिएं सरबंधी विभाग दे विकास कमिशनर हुं'दे दफ्तरै बड़ी मती प्रतिशठा आहले राष्ट्री दस्तकारी अवार्ड 2024 लेई आवेदन मंग्गे ना। 30एं बरै तगर दी उमी दे कारीगर ते घट्टोघट्ट 10एं बरै दे तजुर्बे आहले एहदे शा मती उमी दे कारीगर बी इस राष्ट्री अवार्ड लेई आवेदन करी सकदे ना। इससै चालली 20एं बरै तगर दे तजुर्बे आहले ओकड़े कारीगर जिं'दी उम 50एं बरै शा मती ऐ, ओह शिल्प गुरु अवार्ड लेई आवेदन करी सकडन। मंत्रालय आसेआ कुल 25 पुरस्कार भेंट कीते जाडन जिं'दे चा 6 शिल्प गुरु अवार्ड ते 19 राष्ट्री अवार्ड होडन। आवेदन जमा करोआने दी खीरी तरीक 12 मई ऐ। इच्छुक कारीगर, एहदे लेई अखनूर रोड जम्मू च स्थित हैंडीक्राफ्ट सर्विस सेंटर

कन्नै राबता करी सकदे न जां फही वैबसाईट [www.handicrafts.gov.in](http://www.handicrafts.gov.in) पर जाइयै मती जानकारी लेई सकदे न। योग्यता मानदंड, दिशा निर्देश ते होर दुए ब्यौरे इस वैबसाईट उप्पर उपलब्ध न।

<><><><><><>

## IPL

आईपीएल क्रिकेट च अज्ज राजस्थान रॉयल्स दा मकाबला गुजरात टाइटंस कन्नै होग। एह मैच जयपुर दे सवाई मानसिंह स्टेडियम च संजा साढ़े 7 बजे शुरू होग। एहदे शा पैहले कल ऐतवारें दऊं मैच खेड्डे गे। पैहले मैच च मुंबई इंडियन्स नै लखनऊ सुपर जायंट्स गी 54 रंज कन्नै हराया। 216 रंज दे लक्ष्य दा पिच्छा करदे होई लखनऊ दी टीम 20एं ओवरें 161 रंज गै बनाई सकी। तोआई इक दुए दिलचस्प मकाबले च कल रातीं रॉयल चैलेंजर्स बेंगलुरु नै दिल्ली कैपिटल्स गी 6एं विकटें कन्नै हराई दिता। 163 रंजें दे लक्ष्य दे परते च बेंगलुरु नै 15.3 ओवरें च 4 विकटां मोहाइयै 165 रंज बनाए। बेंगलुरु लेई क्रुनाल पांडया नै सब्बने शा मते 73 रंज बनाए ते नॉट आउट रेह। उनेंगी प्लेयर ऑफ द मैच घोशत कीता गेआ। विराट कोहली नै 51 रंज बनाए। दिल्ली कैपिटल्स लेई अक्षर पटेल नै द'ऊं विकटां लैतियां। दिल्ली नै पैहले बल्लेबाजी करदे होई 20एं ओवरें च 8एं विकटें दे नुक्सान पर 162 रंज बनाए हे।

<><><><><><>

## Weather

मौसम विभाग नै जम्मू-कश्मीर च अज्जै थमां लेइयै औंदे किश दिनें तगर मौसम दे खुश्क रौहने ते प्रदेश दी कई थाहरें पर लू चलने दी भविक्खणी कीती ऐ। मैहकमे दा आखना ऐ जे अज्जै थमां लेइयै पैहली मई तगर मौसम आमतौरा पर खुश्क रौहग ते 2 ते 3 मई गी किश-किश थाहरें पर हल्की बरखा ते गरज-चमक दी संभावना ऐ। उआं औंदे किश दिनें च जम्मू संभाग च लू चलने दे असार जताए गेन।

<><><><><><>

Read by	Vijay Bajaj
Composed	Mukesh Gupta
Editor	Abhilasha Sharma
Skilled	Rajat